

Kemasukan tertinggi sejak Universiti Sains Islam Malaysia Nilai ditubuh

USIM terima 2,444 pelajar baharu

Oleh AINOL AMRIZ ISMAIL
utusanN9@utusan.com.my



SEREMBAN 3 Sept. - Universiti Sains Islam Malaysia (USIM) Nilai dekat sini, menerima seramai 23,483 permohonan tahun ini mengatasi unjuran pelajar iaitu 2,553 tempat sahaja.

Naib Canselornya, Prof. Datuk Dr. Asma Ismail (**gambar**) berkata, bagi sesi kemasukan kali ini, USIM menerima kemasukan pelajar tertinggi sejak ditubuhkan iaitu seramai 2,444 orang.

Katanya, perkembangan itu menunjukkan USIM semakin dikenali dan menjadi institusi pengajian tinggi awam (IPTA) pilihan pertama pelajar untuk menyambung pengajian mereka.

"Dalam hal ini, promosi dan penjenamaan USIM yang merupakan satu-satunya IPTA yang menawarkan sistem pengajian yang mengintegrasikan ilmu naqli dan aqli dalam silibus akademiknya kepada masyarakat telah berjaya memberi impak yang besar," katanya di sini hari ini.

Tambahnya, kemasukan penuntut antarabangsa juga amat baik iai-

tu sebanyak 95 orang tahun ini.

"Antaranya dari Afghanistan, Libya, Jordan, Nigeria, Indonesia, Thailand, Brunei dan Singapura. Kesemua mereka sedang mengikuti Minggu Taaruf yang dikendalikan oleh Bahagian Hal Ehwal Pelajar," ujarnya.

Sesi pendaftaran pelajar baharu Sarjana Muda sesi akademik 2013/2014 USIM di Stadium Tertutup Nilai dekat sini, berjalan lancar dengan kaunter pendaftaran dibanjiri pelajar dan ibu bapa masing-masing sejak awal pagi semalam.

"USIM menawarkan 26 pilihan program pengajian di peringkat Sarjana Muda melalui lapan buah fakultinya antaranya Fakulti Pengajian Quran dan Sunnah (FPQS), Fakulti Kepimpinan dan Pengurusan (FKP), Fakulti Sains dan Teknologi (FST), Fakulti Syariah dan Undang-undang (FSU).

"Fakulti lain ialah Fakulti Perubatan dan Sains Kesihatan (FPSK) yang mana kesemua ini telah membuka peluang pendidikan tinggi yang luas buat pelajar lepasan aliran sekolah agama di negara ini," ujarnya.



PELAJAR baharu ketika hadir membuat pendaftaran di Universiti Sains Islam Malaysia, Nilai, Seremban, Negeri Sembilan, kelmarin.